

四庫全書

集部

欽定四庫全書

集部

白香山詩集卷二十三

詳校官監察御史臣查瑩

檢討臣何思鈞覆勘

覆校官中書臣康儀鈞

校對官中書臣吳裕德

謄錄監生臣李廷讓

欽定四庫全書

白香山詩集卷二十二

歙縣汪立名編

後集二

格詩凡
六十首

和微之詩二十三首

并序

微之又以近作二十三首寄來命僕繼和其間瘵絮
四百字車斜二十篇者流皆韻劇辭殫瓌竒怪譎又
題云奉煩只此一度乞不見辭意欲定霸取威置僕
於窮地耳大凡依次用韻韻同而意殊約體為文

成而理勝此足下素所長者僕何有焉今足下果用
所長過蒙見窘然敵則氣作急則計生四十三章麾
掃並畢不知大敵以為如何夫劔石破山先觀鏡迹
發矢中的兼聽弦聲以足下來章惟求相困故老僕
報語不覺大誇况曩者唱酬近來因繼已十六卷凡
千餘首矣其為敵也當今不見其為多也從古未聞
所謂天下英雄惟使君與操耳戲及此者亦欲三千
里外一破愁顏勿示他人以取笑誚樂天白

和晨霞

此後在上都作

君歌仙氏真我歌慈氏真慈氏發真念念此閻浮人左
命大迦葉右召桓提因千萬化菩薩百億諸鬼神上自
非想頂下及風水輪胎卵溼化類蠢蠢難具陳弘願在
救拔大悲忘辛勤無論善不善豈間冤與親扶開生盲
眼擺去煩惱塵燭以智慧日灑之甘露津千界一時度
萬法無與鄰借問晨霞子何如朝玉宸

和送劉道士遊天台

聞君夢遊仙，輕舉超世霧。握持尊皇節，統衛吏兵軍。靈
旂星月象，天衣龍鳳紋。佩服交帶籙，諷吟藥珠文。閭宮
縹緲間，鈞樂依稀聞。齋心謁西母，膜拜朝東君。煙霏子
晉裾，霞爛麻姑屨。倏忽別真侶，悵望隨歸雲。人生同大
夢，夢與覺誰分。况此夢中夢，悠悠何足云。假如金闕頂
設使銀河瀆，既未出三界，猶應在五蘊。飲嚙日月精，茹
嚼沆瀣芬。尚是色香味六塵之所熏，仙中有天一作大仙
首出夢幻羣。慈光一照燭，奧法相烟煴。不知萬齡暮，不

見三光曛一性自了了萬緣徒紛紛苦海不能漂劫火
不能焚此是竺乾教先生垂典墳

和櫛沐寄道友

櫛沐事朝謁中門初動闕盛服去尚早假寐須臾間鐘
聲發東寺夜色藏南山停驂待五漏人馬同時間高星
粲金粟落月沈玉環出門向闕路坦坦無阻艱始出里
北閉稍轉市西闌晨燭照朝服紫爛復朱殷由來朝廷
士一入多不還因循擲白日積漸凋朱顏青雲已難致

碧落安能攀，但且知止足。尚可銷憂患。

和祝蒼華

蒼華髮
神名

日居復月諸環迴，照下土使我玄雲髮。化為素絲縷，稟
質本羸劣。養生仍莽鹵，痛飲困連宵。悲吟飢過午，遂令
頭上髮種種。無尺五根稀，比黍苗梢細。同釵股，豈是乏
膏沐。非關櫛風雨，最為悲傷多。心焦哀落苦，餘者能有
幾。落者不可數，禿似鵲填河。隨如烏解羽，蒼華何用祝。
苦辭亦休吐，匹如剃頭僧。豈要巾冠主。

和我年三首

我年五十七榮名得幾許
甲乙三道科蘇杭兩州主
才能本淺薄心力虛勞苦
何能隨衆人終老於塵土

我年五十七歸去誠已遲
歷官十五政數若珠纍纍
野萍始賓薦場苗初繫維
因讀管蕭書竊慕大有為
及遭榮遇來乃覺才力羸
黃紙詔頻草朱輪車載脂
妻孥及僕使皆免寒與飢
省躬私自媿知我者微之
永懷山陰守未遂嵩陽期
如何坐留滯頭白江之湄

我年五十七榮名得非少報國竟何如謀身猶未了昔
嘗速官謗恩大而懲小一黜鶴辭軒七年魚在沼將枯
鱗再躍經鍛翻重矯白日上昭昭青雲高渺渺平生頗
同病老大宜相曉紫綬足可榮白頭不為天夙懷慕箕
穎晚節期松篠何當闕下來同拜陳情表

和三月三十日四十韻

送春君何在君在山陰署憶我蘇杭時春遊亦多處為
君歌往事豈敢一作辭勞慮莫怪言語狂須知酬答遽

江南臘月半水凍凝如瘞寒景尚蒼茫和風已吹噓女
牆城似竈雁齒橋如鋸魚尾上翁淪草芽生沮洳律遲
太簇管日緩羲和馭布澤木龍催迎春土牛助雨師習
習灑雲將飄飄翥四野萬里晴千山一時曙杭土麗且
康蘇民富而庶善惡有懲勸剛柔無吐茹兩衙少辭牒
四境稀書疏俗以勞俸安政因閒暇著仙亭日登眺虎
邱時遊豫望仙亭在杭
虎邱寺在蘇尋幽駐旌軒選勝迴賓御舟移
溪鳥避樂作林猿覩池古莫耶沈石竒羅刹踞劍池在
蘇州羅

荆石在
杭州

水苗泥易耨畬粟灰難鉏紫蕨抽出畦白蓮埋

在淤菱花紅帶黯濕葉黃含菸

楚辭云葉菸色而就黃

鏡動波颭

菱雪迴風旋絮手經攀桂馥齒為嘗梅楚坐并船脚敲

行多馬蹄踰聖賢清濁醉水陸鮮肥飲魚膾芥醬調水

葵鹽豉絮

救慮反

雖徼五袴歌幸免兆人詛但令樂不荒

何必遊無侶吳苑僕尋罷越城公尚據舊遊幾容存新

宴誰人與莫空文舉酒強下何曾箸江上易優游城中

多毀譽分應當自盡

一作畫

事勿求人恕我既無子孫君

仍畢婚娶久為雲雨別終擬江湖去
范蠡有扁舟陶潛有籃輦
兩心苦相憶兩口遙相語
最恨七年春春來各一處

和寄樂天

賢愚類相交人情之大率然自古今來
幾人號膠漆近聞屈指數元某與白乙
旁愛及弟兄中權避家室松筠與金石
未足喻堅密在車如輪轅在身如肘腋
又如風雲會天使相召匹不似勢利交
有名而無實項我在杭

歲值君之越日望愁來儀遲宴惜流景疾坐耀黃金帶
酌醜瀨玉質酣歌口不停狂舞衣相拂平生賞心事施
展十未一會笑始啞啞離嗟乃唧唧錢筵纔收拾征權
遽排比後恨苦絲絲前歡何卒卒居人色慘淡行子心
紆鬱風袂去時揮雲帆望中失宿醒和別思目眩心忽
忽病魂黯然銷老淚淒其出別君只如昨芳歲換六七

俱是官家身後期難自必

籍田賦云難
望歲而自必

和寄問劉白

時夢得與樂
天方舟西上

正與劉夢得醉笑大開口適值此詩來歡喜君知否遂
令高卷幕兼遣重添酒起望會稽雲東南一回首愛君
金玉句舉世誰人有功用隨日新資材本天授吟哦不
能散自午將及酉遂留夢得眠匡牀宿東牖

和新樓北園偶集從孫公度周巡官韓秀才
盧秀才范處士小飲鄭侍御判官周劉二從
事皆先歸

聞君新樓宴下對北園花主人既賢豪賓客皆才華初

筵日未高中飲景已斜天地為幕席富貴如泥沙嵇劉
陶阮徒不足置齒牙卧甕鄙畢卓落帽唾孟嘉芳草供
枕藉亂鶯助喧譁醉鄉得道路狂海無津涯一歲春又
盡百年期不賒同醉君勿辭獨醒古所嗟銷愁若沃雪
破悶如割瓜稱觴起為壽此樂無以加歌聲凝貫珠舞
袖飄亂麻相公謂四座今日非自誇有奴善吹笙有婢
彈琵琶十指纖若筍雙鬢驚如鷓履舄起交雜杯盤散
紛拏歸去勿擁過倒載逃難遮明日宴東武後日遊若

那豈獨相公樂謳歌千萬家

和除夜作

君賦此詩夜窮陰歲之餘我和此詩日微和春之初老
知顏狀改病覺支體虛頭上毛髮短口中牙齒疎一落
老病界難逃生死墟况此促促世與君多索居君在浙
江東榮駕方伯輿我在魏闕下謬乘大夫車妻孥常各
飽奴婢亦盈廬惟是利人事比君全不如我統十郎官
君領百吏胥我掌四曹局君管十鄉閭君為父母君大

惠在資儲我為刀筆吏小惡乃誅鉏君提七郡籍我按
三尺書俱已佩金印嘗同趨玉除外寵信非薄中懷何
不攄恩光未報答日月空居諸磊落嘗許君跼促應笑
予所以自知分欲先歌歸歎

和知非

因君知非問詮較天下事第一莫若禪第二無如醉禪
能泯人我醉可忘榮悴與君次第言為我少留意儒教
重禮法道家養神氣重禮足滋彰養神多避忌不如學

禪定中有甚深味曠廓了如空澄凝勝於睡屏除默默
念銷盡悠悠思春無傷春心秋無感秋淚坐成真諦樂
如受空王賜既得脫塵勞兼應離慙媿除禪其次醉此
說非無謂一酌機即忘三杯性咸遂逐臣去室婦降虜
敗軍帥思苦膏火煎憂深扁鑠祕須憑百杯沃莫惜千
金費便似罩中魚脫飛生兩翅勸君雖老大逢酒莫迴
避不然即學禪兩途同一致

和望曉

休吟稽山曉聽詠秦城旦雞鳴初有聲宿鳥猶未散
丁漏向盡夔夔鼓過半南山青沈沈東方白漫漫街心
若流水城角如斷岸星河稍隅落宮闕方輪煥朝車雷
四合騎火星一貫赫奕冠蓋盛熒煌朱紫爛沙堤巨墓
池子城東北低下處舊號蝦蟆墓池市路繞龍斷白日忽照耀紅塵紛散
亂貴教過客避榮任行人者祥煙滿虛空春色無邊畔
鷓行候晷刻龍尾登霄漢臺殿暖宜攀風光晴可翫草
鋪地茵褥雲卷天幃幔鶯雜佩鏘鏘花繞一作衣粲粲

何言終日樂獨起臨風歎歎我同心人一別春七換相
望山隔礙欲去官羈絆何日到江東超然似張翰

和李勢女

減一分太短增一分太長不朱面若花不粉肌如霜色
為天下艷心乃女中郎自言重不幸家破身未亡人各
有一死此死職所當忍將先人體與主為疣瘡妾死主
意快從此兩無妨願信赤心語速即白刃光南郡忽感
激却立捨鋒鋌撫背稱阿姊歸我如歸鄉竟以恩信待

豈止猜妒忘由來
兀上肉不足揮干將
南郡死已久骨
枯墓蒼蒼願於墓上頭
立石鐫此章勸戒天下婦
不令
陰勝陽

和酬鄭侍御東陽春悶放懷追越遊見寄

君得嘉魚置賓席
樂如南有嘉魚時
勁氣森爽竹竿竦
妍文煥爛芙蓉披
載筆在幕名已重
補袞於朝官尚卑
一緘疏入掩谷永
三都賦成排左思
自言拜辭主人後
離心蕩颺風前旗
東南門館別經歲
春眼悵望秋心悲

已上叙
嘉魚

昨日嘉魚來訪我方駕同出何所之樂遊原頭
春尚早百舌新語聲裊裊日趁花忙向南坼風催柳急
從東吹流年愀恍不饒我美景鮮妍來為誰紅塵三條
界阡陌碧草千里鋪郊畿餘霞斷時綺幅裂斜雲展處
羅文紕暮鐘遠近聲互動暝鳥高下飛追隨酒酣將歸
未能去悵然迴望天四垂生何足養稽著論途何足泣
楊漣沔胡不花下伴春醉滿酌綠酒聽黃鸝嘉魚點頭
時一歎聽我此言不知疲語終興盡各分散東西軒騎

分逶迤此詩勿遺聞人見見恐與他為笑資白首舊寮
知我者憑君一詠向周師

周判官師範蘇杭舊
判官去範字叶韻

和自勸二首

稀稀疎疎繞籬竹窄窄狹狹向陽屋屋中有一曝背翁
委置形骸如土木日暮半爐爇炭火夜深一盞紗籠燭
不知有益及民無二十年來食官祿就暖移盤檐下食
防寒擁被帷中宿秋官月俸八九萬豈徒遣爾身温足
勤操丹筆念黃沙莫使飢寒因滯獄

急景凋年急於水念此攬衣中夜起門無宿客共誰言
煖酒挑燈對妻子自飲數杯妻一盞餘酌分張與兒女
微酣靜坐未能眠風霰蕭蕭打窗紙自問有何才與術
入為丞郎出刺史爭知壽命短復長豈得營營心不止

請看韋孔與錢崔半月之間四人死

韋中書孔京兆錢
尚書崔華州十五

日間相
次而逝

和雨中花

真宰倒持生殺柄閒物命長人短命松枝上鶴著下龜

千年不死仍無病人生不得似龜鶴少去老來同旦暝

何異花開旦暝間未落仍遭風雨橫草得經年菜

一作菜

連月惟花不與多時節一年三百六十日花能幾日供

攀折桃李無言難自訴黃鶯解語憑君說鶯雖為說不
分明葉底枝頭謾饒舌

和晨興因報問龜兒

冬旦寒慘澹雲日無晶輝當此歲暮感見君晨興詩君
詩亦多苦苦在兄遠離我苦不在遠纏絲肝與脾西院

病孀婦後牀孤姪兒黃昏一慟後夜半十起時病眼兩

行血衰鬢萬莖絲咽絕五藏脈瘦消

一作消滲

百骸脂雙目

失一目四肢斷兩肢不如溘然逝安用半活為誰謂荼

檠苦荼檠甘如飴誰謂湯火熱湯火冷如澌前時君寄

詩憂念問阿龜喉燥聲氣窒經年無報辭及覩晨興句

未吟先涕垂因茲連連際一吐心中悲茫茫四海間此

苦惟君知去我四千里使我告訴誰仰頭向青天但見

鴈南飛憑鴈寄一語為我達微之弦絕有續膠樹斬可

接枝惟我中腸斷應無連得期

和朝回與王鍊師遊南山下

藹藹春景餘我夏雲初躩蹠退朝騎飄颻隨風裾晨
從四丞相入拜白玉除暮與一道士出尋青溪居吏隱
本齊致朝野孰云殊道在有中適機忘無外虞但媿煙
霄上鸞鳳為吾徒又慙雲水間鷗鶴不我踈坐傾數杯
酒卧枕一卷書興酣頭兀兀睡覺心于于以此送日月
問師為何如

和嘗新酒

空腹嘗新酒偶成夕時醉醉來擁褐裘直至齋時睡
酣不語笑真寢無夢寐殆欲忘形骸詎知屬天地醒餘
和未散起坐澹無事舉臂一欠伸引琴彈秋思

和順之琴者

陰陰花院月耿耿蘭房燭中有弄琴人聲貌俱如玉清
泠石泉引澹泞風松曲遂使君子心不愛凡絲竹

感舊寫真

李放寫我真寫來二十載莫問真何如畫亦銷光彩朱
顏與玄鬢日夜改復改無嗟貌遽非且喜身猶在

授太子賓客歸洛

自此後
東都作

南省去拂衣東都來掩扉病將老齊至心與身同歸白
首外緣少紅塵前事非懷哉紫芝叟千載心相依

秋池二首

身閒無所為心閒無所思况當故園夜復此新秋池岸
閨鳥棲後橋明月出時菱風香散漫桂露光參差靜境

多獨得幽懷竟誰知悠然心中語自問來何遲
朝衣薄且健晚簟清仍滑社近燕影稀雨餘蟬聲歇
閒中得詩境此境幽難說露荷珠自傾風竹玉相戛誰能
一同宿共翫新秋月暑退早涼歸池邊好時節

中隱

大隱住朝市小隱入邱樊邱樊太冷落朝市太囂諠不
如作中隱隱在畱司官似出復似處非忙亦非閒不勞
心與力又免飢與寒終歲無公事隨月有俸錢君若好

登臨城南有秋山君若愛遊蕩城東有春園君若欲一
醉時出赴賓筵洛中多君子可以恣歡言君若欲高卧
但自深掩關亦無車馬客造次到門前人生處一世其
道難兩全賤即苦凍餒貴則多憂患惟此中隱士致身
吉且安窮通與豐約正在四者間

問秋光

殷卿領北鎮崔尹開南幕外事信為榮中懷未必樂何
如不才者兀兀無所作不引窗下琴即舉池上酌澹交

惟對水老伴無如鶴自適頗從容
旁觀誠獲落身心轉
恬泰煙景彌澹泊迴首語秋光
東來應不錯

引泉

一為止足限二為良疾牽
邴罷不因事陶歸非待年
歸來嵩洛下閉戶何翛然
靜埽林下地間疏池畔泉
伊流狹似帶洛石大如拳
誰教明月下為我聲濺濺
竟夕舟中坐有時橋上眠
何用施屏障水竹繞牀前

知足吟

和崔十八
未貧作

不種一隴田倉中有餘粟不采一枝桑箱中有餘服官
閒離憂責身泰無羈束中人百戶稅賓客一年祿尊中
不乏酒籬下仍多菊是物皆有餘非心無所欲吟君未
貧作因歌知足曲自問此時心不足何時足

立名按避暑錄話云樂天自刑部侍郎以病求分司
時年纔五十八自是蓋不復出中間一為河南尹期
年輒去再除同州刺史不拜雍容無事順適其意而
滿足其欲者十有六年方太和開成會昌之間天下
變故所更不一元稹以廢黜死李文饒以讒嫉死雖
裴晉公猶懷疑畏而牛僧孺李宗閔皆不免萬里之
行所謂李逢吉令狐楚李珣之徒泛泛非素與游者
其冰炭低昂未嘗有虛日顧樂天所得豈不多哉

酬集賢劉郎中對月見寄兼懷元浙東

月在洛陽天天高淨如水下有白頭人擘衣中夜起思
遠鏡亭上光深書殿裏眇然三處心相去各千里

太湖石

遠望老嵯峨近觀怪嶽崱纔高八九尺勢若千萬尋嵌
空華陽洞重疊匡山岑邈矣仙掌迴呀然劍門深形質
冠今古氣色通晴陰未秋已瑟瑟欲雨先沈沈天姿信
為異時用非所任磨刀不如礪擣帛不如砧何乃主人

意重之如萬金豈伊造物者獨能知我心

偶作二首

擾擾貪生人幾何不夫闕遑遑愛名人幾何能貴達伊
余信多幸拖紫垂白髮身為三品官年已五十八筋骸
雖早衰尚未苦羸愒資產雖不豐亦不甚貧竭登山力
猶在遇酒興時發無事日月長不羈天地闊安貧有處
所適意無時節解帶松下風抱琴池上月人間所重者
相印將軍鉞謀慮繫安危威權主生殺焦心一身苦災

手旁人熟未必方寸間得如吾快活

立名按青箱雜記白詩無事日月長不羈天地闊此
達者之詞也孟東野詩出門即有礙誰謂天地寬此
褊狹者之詞也然則天
地何嘗礙郊自礙耳

日出起盥櫛振衣入道場寂然無他念但對一爐香日
高始就食食亦非膏粱精粗隨所有亦足飽充腸日午
脫巾簪燕息窗下牀清風颯然至卧可致羲皇日西引
杖屨散步遊林塘或飲茶一盞或吟詩一章日入多不
食有時惟命觴何以送間夜一曲秋霓裳一日分五時

作息率有常自喜老後健不嫌閒中忙是非一以貫身
世交相忘若問此何許此是無何鄉

葺池上舊亭

池月夜淒涼池風曉蕭颯欲入池上冬先葺園中閣向
暖窗戶開迎寒簾幕合苔封舊瓦木水照新朱蠟軟火
深土壚香膠小瓷榼中有獨宿翁一燈對一榻

崔十八新池

愛君新小池池色無人知見底月明夜無波風定時忽

看不似水一泊稀琉璃

翫止水

動者樂流水靜者樂止水利物不如流鑒形不如止淒
清早霜降淅瀝微風起中面紅葉開四隅綠萍委廣狹
八九丈灣環有涯涘淺深三四尺洞徹無表裏靜分鶴
翹足澄見魚掉尾迎眸洗眼塵隔甕蕩心滓定將禪不
別明與誠相似清能律貪夫澹可交君子豈惟空狎翫
亦取相倫擬欲識靜者心水源只如此

聞崔十八宿予新昌敝宅時予亦宿崔家依仁
新亭一宵偶同兩興暗合因而成詠聊以寫懷
陋巷掩敝廬高居敞華屋新昌十株松依仁萬莖竹松
前月臺白竹下風池綠君向我齋眠我在君亭宿平生
有微尚彼此多幽獨何必本主人兩心聊自足

日長

日長晝加餐夜短朝餘睡春來寢食間雖老猶有味林
塘得芳景園曲生幽致愛水多棹舟惜花不埽地幸無

眼下病且向尊前醉身外何足言人間本無事

三月三十日作

今朝三月盡寂寞春事畢黃鳥漸無聲朱櫻新結實臨
風獨長歎此歎意非一半百過九年艷陽殘一日隨年
減歡笑逐日添哀疾且遣花下歌送此杯中物

慵不能

架上非無書眼慵不能看匣中亦有琴手慵不能彈腰
慵不能帶頭慵不能冠午後恣情寢午時隨事餐一餐

終日飽一寢至夜安飢寒亦閒事况乃不飢寒

晨興

宿鳥動前林晨光上東屋銅爐添早香紗籠滅殘燭頭
醒風稍愈眼飽睡初足起坐兀無思叩齒三十六何以
解宿齋一杯雲母粥

朝課

平甃白石渠靜埽青苔院池上好風來新荷大如扇小
亭中何有素琴對黃卷藥珠諷數篇秋思彈一徧從容

朝課畢方與客相見

天竺寺七葉堂避暑

鬱鬱復鬱鬱伏熱何時畢
行入七葉堂煩暑隨步失
檐雨稍霏微宵風正蕭瑟
清宵一覺睡可以銷百疾

立名按咸淳臨安志下天竺寺有七葉堂載公此詩是亦杭州作編者誤入洛下詩耳然集中前後倒置者甚多未能盡正也

香山寺石樓潭夜浴

炎光晝方熾暑氣宵彌毒
搖扇風甚微褰裳汗霏霖
起

向月下行來就潭中浴平石為浴牀窪石為浴斛綃巾
薄露頂草屨輕乘足清涼詠而歸歸上石樓宿

嗟髮落

朝亦嗟髮落暮亦嗟髮落落盡誠可嗟盡來亦不惡既
不勞洗沐又不煩梳掠最宜溼暑天頭輕無髻縛脫置
垢巾幘解去塵纓絡銀鉗貯寒泉當頂傾一勺有如醜
醐灌坐受清涼樂因悟自在僧亦資於剃削

安穩眠

家雖日漸貧猶未苦飢凍身雖日漸老幸無急病痛眼
逢鬧處合心向閒時用既得安穩眠亦無顛倒夢

池上夜境

晴空星月落池塘澄鮮淨綠表裏光露簾清瑩迎夜滑
風襟瀟灑先秋涼無人驚處野禽下新睡覺時幽草香
但問塵埃能去否濯纓何必問滄浪

書紳

仕有職役勞農有畎畝勤優哉分司叟心力無苦辛歲

晚頭又白自問何欣欣新酒始開羞舊穀猶滿困吾嘗
靜自思往往夜達晨何以送吾老何以安吾貧歲計莫
如穀飽則不干人日計莫如醉醉則兼忘身誠知有道
理未敢勸交親恐為人所哂聊自書諸紳

秋遊平泉贈韋處士閒禪師

秋景引閒步山遊不知疲杖藜捨輿馬十里與僧期昔
嘗憂六十四體不支持今來已及此猶未苦衰羸

子往
年有

詩云三十氣大壯胃中多是非六
十年太老四體不支持今故云心興遇境發身力因

行知尋雲到起處愛泉聽滴時南村韋處士西寺間禪
師山頭與澗底聞健且相隨

遊坊口懸泉偶題石上

時為河
南尹

濟源山水好老尹知之久常日聽人言今秋入吾手孔
山刀劍立沁水龍蛇走危磴上懸泉澄灣轉坊口虛明
見深底淨綠無纖垢仙櫂浪悠揚塵纓風抖擻巖寒松
柏短石古莓苔厚錦座纓高低翠屏張左右雖無安石
妓不乏文舉酒談笑逐身來管絃隨事有時逢杖錫客

或值垂綸叟相與澹忘歸自辰將及酉公門欲返駕溪
路猶迴首早晚重來遊心期罷官後

對火翫雪

平生所心愛愛火兼憐雪火是臘天春雪為陰夜月鵝
毛紛正隴獸炭敲初折盈尺白鹽寒滿爐紅玉熱稍宜
杯酌動漸引笙歌發但識歡來由不知醉時節銀盤堆
柳絮羅袖搏瓊屑共愁明日銷便作經年別

六年寒食洛下宴遊贈馮李二少尹

豐年寒食節美景洛陽城三尹皆強健七日盡晴明東
郊蹋青草南園攀紫荆風坼海榴艷露墜木蘭英假開
春未老宴合日屢傾珠翠混花影管絃藏水聲佳會不
易得良辰亦難并聽吟歌暫輟看舞杯徐行米價賤如
土酒味濃於餽此時不盡醉但恐負平生殷勤二曹長
各捧一銀觥

苦熱中寄舒員外

何堪日衰病復此時炎燠厭對俗杯盤倦聽凡絲竹藤

牀鋪晚雪角枕截寒玉安得清瘦人
新秋夜同宿非君固不可何夕枉高躅

間夕

一聲早蟬發數點新螢度蘭缸耿無烟
筠簟清有露未歸後房寢且下前軒步
斜月入低廊涼風滿高樹放懷常自適
遇境多成趣何法使之然心中無細故

寄情

灼灼早春梅東南枝最早持來翫未足
花向手中老芳

香銷掌握悵望生懷抱豈無後開花念此先開好

舒員外遊香山寺數日不歸兼辱尺書大誇勝
事時正值坐衙慮囚之際走筆題長句以贈之

香山石樓倚天開翠屏壁立波環迴黃菊繁時好客到

碧雲合處佳人來

謂遣英倩二妓
與舒君同遊

酡顏一笑天桃綻清

吟數聲寒玉哀軒騎逶遲擢容與畱連三日不能迴白
頭老尹府中坐早衙纔退暮衙催庭前堦上何所有纍
囚成貫案成堆豈無池塘長秋草亦有絲竹生塵埃今

日清光昨夜月竟無人來勸一杯

早冬遊王屋自靈都抵陽臺上方望天壇偶吟

成章寄溫谷周尊師中書李相公

霜降山水清王屋十月時石泉碧漾漾巖樹紅離離朝
為靈都遊暮有陽臺期飄然世塵外鸞鶴如可追忽念
公程盡復慙身力衰天壇在天半欲上心遲遲嘗聞此
遊者隱客與損之各抱貴仙骨俱非泥垢姿二人相顧
言彼此稱男兒若不為松喬即須作臯夔今果如其語

光彩雙歲蕤一人佩金印一人翳玉芝我來高其事詠
歎偶成詩為君題石上欲使故山知

醉中重留夢得

劉郎劉郎莫先起蘇臺蘇臺隔雲水酒錢來從一百分
馬頭去便三千里

白香山詩集卷二十二

欽定四庫全書

白香山詩集卷二十三

歙縣汪立名編

後集三

格詩凡五
十八首

詠興五首

并序

七年四月予罷河南府歸履道第廬舍自給衣儲自
充無欲無營或歌或舞頽然自適蓋河洛間一幸人
也遇興發詠偶成五章各以首句命為題目

解印出公府

解印出公府抖擻塵土衣百吏放爾散雙鶴隨我歸歸
來履道宅下馬入柴扉馬嘶返舊櫪鶴舞還故池雞犬
何忻忻鄰里亦依依年顏老去日生計勝前時有帛禦
冬寒有穀防歲饑飽於東方朔樂於榮啓期人生且如
此此外吾不知

出府歸吾廬

出府歸吾廬靜然安且逸更無客干謁時有僧問疾家
僮十餘人樅馬三四匹慵發經旬卧興來連日出出遊

愛何處嵩碧伊瑟瑟况有清和天正當疎散日身間自
為貴何必居榮秩心足即非貧豈惟金滿室吾觀權勢
者苦以身徇物炙手外炎炎履水中慄慄朝飢口忘味
夕惕心憂失但有富貴名而無富貴實

池上有小舟

池上有小舟舟中有胡牀牀前有新酒獨酌還獨嘗熏
若春日氣皎如秋水光可洗機巧心可蕩塵垢腸岸曲
舟行遲一曲進一觴未知幾曲醉醉入無何鄉黃緣潭

島間水竹深青蒼身閒心無事白日為我長我若未忘
世雖閒心亦忙世若未忘我雖退身難藏我今異於是
身世交相忘

四月池水滿

四月池水滿龜游魚躍出吾亦愛吾池池邊開一室人
魚雖異族其樂歸於一旦與爾為徒逍遙同過日爾無
羨滄海蒲藻可委質吾亦忘青雲衡茅足容膝况吾與
爾輩本非蛟龍匹假如雲雨來祇是池中物

小庭亦有月

小庭亦有月
小院亦有花
可憐好風景
不解嫌貧家
菱

角執笙簧
谷兒抹琵琶
紅綃信手舞
紫綃隨意歌
菱谷
紫紅

皆小臧
獲名也
村歌與社舞
客哂主人誇
但問樂不樂
豈在鐘

鼓多客告暮
將歸主稱日
未斜請客稍
深酌願見朱
顏

配客知主意
厚分數隨後
加堂上燭未
秉座中冠已
峨

左顧短紅袖
右命小青蛾
長跪謝貴客
蓬門勞見過
客

散有餘興
醉卧獨吟
哦幕天而
席地誰奈
劉伶何

秋涼閒卧

殘暑晝猶長早涼秋尚嫩
露荷散清香風竹含疎韻
幽閒竟日卧衰病無人問
薄暮宅門前槐花深一寸

酬思黯相公見過敝居戲贈

軒蓋光照地行人為徘徊
呼傳君子出乃是故人來
訪我入窮巷引君登小臺
臺前多竹樹池上無塵埃
貧家何所有新酒三兩杯
款曲語上馬從容復遲迴
留守不外宿日斜宮漏催
但留金刀贈未接玉山頽
家醞不敢

惜待君來即開村妓不辭出恐君輒然咍

再授賓客分司

優穩四皓官清崇三品列伊予再塵忝內媿非才哲俸
錢七八萬給受無虛月分命在東司又不勞朝謁既資
閒養疾亦賴慵藏拙賓友得從容琴觴恣怡悅乘籃城
外去繫馬花前歇六遊金谷春五看龍門雪吾若默無
語安知吾快活吾欲更盡言復恐人豪奪應為時所笑
苦惜分司闕但問適意無豈論官冷熱

把酒

把酒仰問天古今誰不死所貴未死間少憂多歡喜窮
通諒在天憂喜即由己是故達道人去彼而取此勿言
未富貴久忝居祿仕借問宗族間幾人拖金紫勿憂漸
衰老且喜加年紀試數班行中幾人及暮齒朝餐不過
飽五鼎徒為爾夕寢止求安一衾而已矣此外皆長
物於我雲相似有子不留金何況兼無子

去聲

首夏

林靜蚊未生池靜蛙未鳴景長天氣好竟日和且清春
禽餘哢在夏木新陰成兀爾水邊坐翛然橋上行自問
一何適身閒官不輕料錢隨月用生計逐日營食飽慙
伯夷酒足媿淵明

陶潛詩云飲酒常不足

壽倍顏氏子富百黔婁

生有一即為樂况吾四者并所以私自慰雖老有心情

代鶴

我本海上鶴偶逢江南客感君一顧恩同來洛陽陌洛
陽寡族類皎皎惟兩翼貌是天與高色非日浴白主人

誠可戀其奈軒庭窄飲啄雜難羣年深損標格故鄉渺
何處雲水重重隔誰念深籠中七換摩天翮

立秋夕有懷夢得

露簾荻竹青風扇蒲葵輕一與故人別再見新蟬鳴是
夕涼颼起閒境入幽情迴燈見棲鶴隔竹聞吹笙夜茶
一兩杓秋吟三數聲所思渺千里雲水長洲城

哭崔常侍晦叔

頑賤一拳石精珍百鍊金名價既相遠交分何其深中

誠一以合外物不能侵透迤二十年與世同浮沈晚有
退閒約白首歸雲林垂老忽相失悲哉口語心春日嵩
高陽一作春日 秋夜清洛陰丘園共誰卜山水共誰尋
風月共誰賞詩篇共誰吟花開共誰看酒熟共誰斟惠
死莊杜口鍾歿師廢琴道理使之然從古非獨今吾道
自此孤我情安可任惟將病眼淚一灑秋風襟

新秋曉興

濁暑忽已退清宵未全長晨釭耿殘燄宿閣凝微香喔

啞雞下樹輝輝日上梁
枕低茵席軟卧穩身入牀
睡足景猶早起初風乍涼
展張小屏障收拾生衣裳
還有惆悵事遲遲未能忘
拂鏡梳白髮可憐冰照霜

秋日與張賓客舒著作同遊龍門醉中狂歌凡
二百三十八字

秋天高高秋光清秋風嫋嫋秋蟲鳴
嵩峯餘霞錦綺卷伊水細浪鱗甲生
洛陽閒客知無數少出遊山多在城
商嶺老人自追逐蓬丘逸士相逢迎
南出鼎門十八里

莊店邈迤橋道平不寒不熱好時節鞍馬穩快衣衫輕
並轡踟躕下西岸扣舷容與繞中汀開懷曠達無所繫
觸目勝絕不可名荷衰欲黃荇猶綠魚樂自躍鷗不驚
翠藻蔓長孔雀尾彩船櫓急寒鴈聲家醞一壺白玉液
野花數把黃金英晝遊四省西日暮夜話三及東方明
暫停杯觴輟吟詠我有狂言君試聽丈夫一生有二志
兼濟獨善難得并不能救療生民病即須先濯塵土纓
况吾頭白眼已暗終日戚促何所成不如展眉開口笑

龍門醉卧香山行

履信池櫻桃島上醉後走筆送別舒員外兼寄

宗正李卿考功崔郎中

櫻桃島前春去春花萬枝忽憶與宗卿閒飲日又憶與
考功狂醉時歲晚無花空有葉風吹滿地乾重疊蹋葉
悲秋復憶春池邊樹下重殷勤今朝一酌臨寒水此地
三四別故人櫻桃花來春千萬朶來春共誰花下坐不
論崔李上青雲明日舒三亦拋我

秋池獨泛

蕭疎秋竹籬清淺秋風池一隻短舫艇一張斑鹿皮皮
上有野叟手中持酒卮半酣箕踞坐自問身為誰嚴子
垂釣日蘇門長嘯時悠然意自得意外何人知

冬日早起閒詠

冰塘耀初旭風竹飄餘霰幽境雖目前不因閒不見晨
起對爐香道經尋兩卷晚坐拂琴塵秋思彈一遍此外
更無事開尊時自勸何必東風來一杯春上面

歲暮

慘澹歲云暮窮陰動經旬霜風裂人面冰雪摧車輪而
我當是時獨不知苦辛晨炊廩有米夕爨廚有新夾帽
長覆耳重裘寬裹身加之一杯酒煦嫗如陽春洛城士
與庶比屋多飢貧何處爐有火誰家甑無塵如我飽煖
者百人無一人安得不慙媿放歌聊自陳

南池早春有懷

朝遊北池上晚憩南塘畔西日雪全消東風冰盡泮
筵

篋魚尾掉瞥瞥鵝毛換泥暖草芽生沙虛泉脈散晴芳
冒苔島宿潤侵蒲岸落下日初長江南春欲半時光共
拋擲人事堪嗟歎倚櫂忽尋思去年池上伴

古意

脈脈復脈脈美人千里隔不見來幾時瑤草三四碧玉
琴聲悄悄鸞鏡塵幕幕昔為連理枝今作分飛翮寄書
多不達加飯終無益心腸不自寬衣帶何由窄

山遊示小妓

雙鬢垂未合三十纔過半本是綺羅人今為山水伴春
泉共揮弄好樹同攀翫笑容花底迷酒思風前亂紅凝
舞袖急黛慘歌聲緩莫唱楊柳枝無腸與君斷

神照禪師同宿

八年三月晦山梨花滿枝龍門水西寺夜與遠公期晏
坐自相對密語誰得知前後際斷處一念不生時

張常侍相訪

西亭晚寂寞鶯散柳陰繁水戶簾不卷風牀席自翻忽

聞車馬客來訪蓬蒿門况是張常侍安得不開尊

早夏遊宴

雖慵興猶在雖老心猶健昨日山水遊今朝花酒宴山
榴艷似火玉蘂飄如霰榮落逐瞬遷炎涼隨刻變未收
木綿褥已動蒲葵扇且喜物與人年年得相見

感白蓮花

白白芙蓉花本生吳江濱不與紅者雜色類自區分誰
移爾至此姑蘇白使君初來苦顛賴久乃芳氛氲月月

葉換葉年年生根根陳根與故葉銷化成泥塵化者日
已遠來者日復新一為池中物永別江南春忽憶西涼
州中有天寶民埋沒漢父祖孳生胡子孫已忘鄉土戀
豈念君親恩生人尚復爾草木何足云

詠所樂

獸樂在山谷魚樂在陂池蟲樂在深草鳥樂在高枝所
樂雖不同同歸適其宜不以彼易此况論是與非而我
何所樂所樂在分司分司有何樂樂哉人不知官優有

祿料職散無羈縻
嬾與道相近鈍將閒
自隨昨朝拜表
迴今晚行香歸
歸來北窻下解巾
脫塵衣冷泉灌我頂
暖水濯四肢體中
幸無疾卧任清風
吹心中又無事坐
任白日移或開書
一編或飲酒一卮
但得如今日終身
無厭時

思舊

閒日一思舊舊遊
如目前再思今何
在零落歸下泉退
之服流黃一病訖
不痊微之鍊秋石
未老身溘然杜子

得丹訣終日斷腥羶崔君誇藥力經冬不衣綿或疾或
暴天悉不過中年惟予不服食老命反遲延況在少壯
時亦為嗜欲牽但耽葷與血不識汞與鉛飢來吞熟物
渴來飲寒泉詩後五藏神酒汨三丹田隨日合破壞至
今粗完全齒牙未缺落肢體尚輕便已開第七秩飽食
仍安眠且盡杯中物其餘皆付天

寄盧少尹

老誨心不亂莊誠形太勞生命既能保死籍亦可逃嘉

穀與旨酒信是腐腸膏艷聲與麗色真為伐性刀補養
在積功如裘集衆毛將欲致千里可得差一毫

心不亂
形太勞

至差一毫皆出老莊
及諸道書仙方禁誡顏回何為者
簞瓢纔自給肥膿不

到口年不登三十張蒼何為者
染愛浩無際妾媵填後
房竟壽百餘歲蒼壽有何德
回天有何辜誰謂具聖體
不如肥瓠軀遂使世俗心
多疑仙道書寄問盧先生
此理當何如

池上清晨候皇甫郎中

曉景麗未熱晨飈鮮且涼池幽綠蘋合霜潔白蓮香深
埽竹間徑靜拂松下牀玉柄鶴翎扇銀鬕雲母漿屏除
無俗物瞻望惟清光何人擬相訪羸女從蕭郎

詠懷

我知世無幻了無干世意世知我無堪亦無責我事由
茲兩相忘因得長自遂自遂意何如閒官在閒地閒地
惟東都東都少名利閒官是賓客賓客無牽累嵇康日
日嬾畢卓時時醉酒肆夜深歸僧房日高睡形安不勞

苦神泰無憂畏從官三十年無如今氣味鴻雖脫羅戈
鶴尚居祿位惟此未忘懷有時猶內媿

北窻三友

今日北窻下自問何所為欣然得三友三友者為誰琴
罷輒舉酒酒罷輒吟詩三友遞相引循環無已時一彈
愜中心一詠暢四肢猶恐中有間以醉彌縫之豈獨吾
拙好古人多若斯嗜詩有淵明嗜琴有啓期嗜酒有伯
倫三人皆吾師或乏儋石儲或穿帶索衣絃歌復觴詠

樂道知所歸三師去已遠高風不可追三友遊甚熟無
日不相隨左擲白玉卮右拂黃金徽酣不疊紙走筆
操狂詞誰能持此詞為我謝親知縱未以為是豈以我
為非

吟四雖 雜言

酒酣後歌歇時請君添一酌聽我吟四雖年雖老猶少
於韋長史命雖薄猶勝於鄭長水眼雖病猶明於徐郎
中家雖貧猶富於郭庶子省躬審分何僥倖值酒逢歌

且歡喜忘榮知足委天和亦應得盡生理

分司同官
中韋長史

績年七十餘郭庶子求貧苦最甚徐郎中晦因疾喪明
余為河南尹時見同年鄭俞始授長水縣令因歎四子
而成此
篇也

裴侍中晉公以集賢林亭即事詩二十六韻見

贈猥蒙徵和才拙詞繇輒廣為五百言以伸

酬獻

三江路千里五湖天一涯何如集賢第中有平津池
池勝主見覺景新人未知竹森翠琅玕水深洞琉璃水竹

以為質質立而文隨文之者何人公來親指麾疏鑿出人意結構得地宜虛襟一搜索勝槩無遁遺因下張沼
泚依高築階基嵩峯見數片伊水分一支南溪修且直
長波碧逶迤北館壯復麗倒影紅參差東島號晨光杲
曜迎朝曦西嶺名夕陽杳暖留落暉前有水心亭動蕩
架漣漪後有開闔堂寒溫變天時幽泉鏡泓澄怪石山
欖危已上八所
各具本名春葩雪漠漠謂杏
花島夏果珠離離謂櫻
桃島主
人命方舟宛在水中坻親賓次第至酒樂前後施解纜

始登汎山遊仍水嬉沿洄無滯礙向背窮幽竒瞥過遠
橋下飄旋深澗陞管絃去縹緲羅綺來霏微擢風逐舞
迴梁塵隨歌飛宴餘日云暮醉客未放歸高聲索彩牋
大笑催金卮唱和筆走疾問答杯行遲一詠清兩耳一
酣暢四肢主客忘貴賤不知俱是誰客有詩魔者吟哦
不知疲乞公殘紙墨一掃狂歌詞維云社稷臣赫赫文
武姿十授丞相印五建大將旗四朝致勛華一身冠臯
夔去年才七十決赴懸車期公志不可奪君恩亦難違

從容就中道俛僂來保釐貂蟬雖未脫鸞鳳已不羈歷
徵今與古獨步無等夷陸賈功業少二疏官秩卑乘舟
范蠡懼辟穀留侯飢豈若公今日身安家國肥羊祜在
漢南空留峴首碑柳惲在江南祇賦汀洲詩謝安入東
山但說攜蛾眉山簡醉高陽惟聞倒接巵豈如公今日
餘力兼有之願公壽如山安樂長在茲願我比蒲稗永
得相因依

謝靈運詩云蒲稗相因依○立名按韻語陽秋張衡詩客賦醉言歸主稱露未晞白詩有

客告暮將歸主稱日未斜載瓶此注可見公極平易句亦必有本蓋唐人最重文選也

晚歸香山寺因詠所懷

我年日已老我身日已閒
閒出都門望但見水與山
關塞碧巖巖伊流清潺潺
中有古精舍軒戶無扃關
岸草歇可藉徑蘿行可攀
朝隨浮雲出夕與飛鳥還
吾道本迂拙世途多險艱
嘗聞嵇呂輩尤悔生疎頑
巢悟入箕穎皓知返商顏
豈惟樂肥遯聊復祛憂患
吾亦從此去

終老伊嵩間

立名按劇談錄樂天為少傅分務洛師情興高逸盧尚書簡解有別墅近枕伊水冬日與羣從子姪同遊

倚欄眺嵩洛俄而霰雪微下情興益高因話廉察金陵常記江南煙水每見居人以葉舟浮泛就食菰米鱸魚近來思之如在心目良久忽見二人衣蓑笠循岸而來牽引蓬艇船頭覆青幕中有白衣人與衲僧偶坐船後有小窳安桐甌卅角童煮茗泝流過於檻前舟中吟嘯方耐問之乃是白傅與僧佛光自建春門往香山精舍此一
段可謂天然圖畫

張常侍池涼夜閒讌贈諸公

竹橋新月上水岸涼風至對月五六月管絃三兩事留
連池上酌款曲城外意或嘯或謳吟誰知此閒味迴看
市朝客矻矻趨名利朝忙少遊宴夕困多眠睡清涼屬

吾徒相逢勿辭醉

和皇甫郎中秋曉同登天宮閣言懷六韻

碧天忽已高白日猶未短玲瓏曉樓閣清脆秋絲管張
翰一杯酣嵇康終日嬾塵中足憂累雲外多疎散病木
斧斤遺冥鴻羈紲斷逍遙二三子永願為閒伴

送呂漳州

今朝一壺酒言別漳州牧半自要閒遊愛花憐草綠花
前下鞍馬草上攜絲竹行客飲數杯主人歌一曲端居

惜風景屢出勞僮僕獨醉似無名借君作題目

短歌行

世人求富貴多為奉嗜欲盛衰不自由得失常相逐問
君少年日苦學將干祿負笈塵中遊抱書雪前讀布衾
不周體藜茹纔充腹三十登宦途五十被朝服奴溫新
挾纊馬肥初食粟未敢議歡遊尚為名檢束耳目聾暗
後堂上調絲竹牙齒缺落時盤中堆酒肉彼來此已去
外餘中不足少壯與榮華相避如寒燠青雲去地遠白

日經天速從古無奈何短歌聽一作空一曲

詠懷

高人樂丘園中人慕官職一事尚難成兩途安可得
遑干世者多苦時命塞亦有愛閒人又為窮餓逼我今
幸雙遂祿仕兼游息未嘗羨榮華不省勞心力妻孥與
婢僕亦免愁衣食所以吾一家面無憂喜色

府西亭納涼歸

避暑府西亭晚歸有閒思夏淺蟬未多綠槐陰滿地帶

寬衫解領馬穩人攏轡面上有涼風眼前無俗事路經
府門過落日照官次牽聯縲綫囚奔走塵埃吏低眉悄
不語誰復知茲意憶得五年前晚衙時氣味

老熟

一飽百情足一酣萬事休何人不衰老我老心無憂仕
者拘職役農者勞田疇何人不苦熟我熟身自由卧風
北窻下坐月南池頭腦涼脫烏帽足熟濯清流慵發晝
高枕興來夜汎舟何乃有餘適祇緣無過求或問諸親

友樂天是與不亦無別言語多道太悠悠悠悠君不知
此味深且幽但恐君知後亦來從我遊

新秋喜涼因寄兵部楊侍郎

外強火未退中銳金方戰一夕風雨來炎涼隨數變徐
徐炎景度稍稍涼颺扇枕簟忽淒清中裳亦輕健老夫
納秋候心體殊安便睡足一屈伸搔首摩挲面褰簾對
池竹幽寂如僧院俯觀游魚羣仰數浮雲片間忙各有
趣彼此寧相見昨日聞慕巢召對延英殿

嬾放二首呈劉夢得吳方之

青衣報平旦呼我起盥櫛
今早天氣寒郎君應不出
又無賓客至何以銷閒日
已向微陽前暖酒開詩帙

朝憐一牀日暮愛一爐
火牀暖日高眠爐溫夜深坐
雀羅門嬾出鶴髮頭
慵裹除却劉與吳何人來問我

六十六

病知心力減老覺光陰速
五十八歸來今年六十六
鬢絲千萬白池草八九綠
童穉盡成人園林半喬木
看山

倚高石引水穿深竹雖有潺湲聲至今聽未足

三適贈道友

褐綾袍厚暖卧蓋行坐披紫氍履寬穩蹇步頗相宜足
適已忘履身適已忘衣况我心又適兼忘是與非三適
合為一怡怡復熙熙禪那不動處混沌未鑿時此固不
可說為君強言之

洛陽春贈劉李二賓客

齊梁格

水南冠蓋地城東桃李園雪消洛陽堰春入永通門淑

景方靄靄遊人稍喧喧年豐酒漿賤日晏歌吹繁中有
老朝客華髮映朱軒從容三兩人藉草開一尊尊前春
可惜身外事勿論明日期何處杏花遊趙村

洛城東有
趙村杏花

千餘
樹

寒食

人老何所樂樂在歸鄉國我歸故園來九度逢寒食故
園在何處池館東城側四鄰梨花時二月伊水色豈獨
好風土仍多舊親戚出去恣歡遊歸來聊燕息有官供

祿俸無事勞心力但恐優穩多微躬消不得

寄李蘇州兼示楊瓊

真娘墓頭春草碧心奴鬢上秋霜白為問蘇臺酒席中
使君歌笑與誰同就中猶有楊瓊在堪上東山伴謝公

和裴令公一日日一年年雜言見贈

一日日作老翁一年年過春風公心不以貴隔我我散
惟將閒伴公我無才能忝高秩合是人間閒散物公有
功德在生民何因得作自由身前日魏王潭上宴連夜

今日午橋池頭遊拂晨山客硯前吟待月野人樽前醉
送春不敢與公閒中爭第一亦應占得第二第三人

奉和裴令公三月上巳日遊太原龍泉憶去歲

禊洛見示之作

依來體
雜言

去歲暮春上巳共泛洛水中流今歲暮春上巳獨立香
山下頭風光間寂寂旌旆遠悠悠丞相府歸晉國太行
山礙并州鵬背負天龜曳尾雲泥不可得同遊

立名按公集雜言對偶者今本皆作律詩然公與元
九書云有五言七言長句絕句自百韻至兩韻者謂

之雜律詩未嘗及雜言也今俱附格詩
鹽官胡氏本則別長短句一體以歸之

憶江南詞三首

此曲亦名謝秋娘每首五句

江南好風景舊曾諳日出江花紅勝火春來江水綠如
藍能不憶江南

江南憶最憶是杭州山寺月中尋桂子郡亭枕上看潮
頭何日更重遊

江南憶其次憶吳宮吳酒一杯春竹葉吳娃雙舞醉笑
蓉早晚復相逢

立名按郭茂倩云憶江南一曰望江南樂府雜錄曰望江南本名謝秋娘李德裕鎮浙西為宴謝秋娘所

製改為

望江南

汎小輪二首

水一塘輪一隻
輪頭漾漾知風起
輪背蕭蕭聞雨滴
醉卧船中欲醒時
忽疑身是江南客

船緩進水平流
一莖竹篙別船尾
兩幅青幕覆船頭
亞竹亂藤多照岸
如從鳳口向湖洲

白香山詩集卷二十三

欽定四庫全書

集部

白香山詩集卷二十五

詳校官監察御史臣查瑩

檢討臣何思鈞覆勘

覆校官中書臣康儀鈞

校對官中書臣吳裕德

謄錄監生臣李廷讓

欽定四庫全書

白香山詩集卷二十四

歙縣汪立名編

後集四

格詩凡八
十六首

題裴晉公女兒山刻石詩後

并序

裴侍中晉公出討淮西時過女兒山下刻石題詩末
句云待平賊壘報天子莫指仙山示武夫果如所言
剋期平賊由是淮蔡迄今底寧殆二十年人安生業
夫嗟歎不足則詠歌之故居易作詩二百言繼題公

之篇末欲使采詩者修史者後之往來觀者知公之
功德本末前後也

何處畫功業何處題詩篇麒麟高閣上女几小山前爾
後多少時四朝二十年賊骨化為土賊壘犁為田一從

賊壘平陳蔡民晏然騾軍成牛戶

蔡寇號騾子軍陳蔡
間農驍銳者人畜牛

者呼為
牛戶

鬼火變人煙生子已嫁娶種桑亦絲綿皆云公

之德欲報無由緣公今在何處守都鎮三川舊宅留永
樂新居開集賢公今在何官被袞珥貂蟬戰袍破猶在

髀肉生欲圓襟懷轉蕭灑氣力轉精堅登山不拄杖上
馬能掉鞭利澤浸入地福降自升天昔號天下將今稱
地上仙勿追赤松遊勿拍洪崖肩商山有遺老可以奉

周旋

洛陽有愚叟

洛陽有愚叟白黑無分別浪迹雖似狂謀身亦不拙點
檢盤中飯非精亦非糲點檢身上衣無餘亦無闕天時
方得所不寒復不熱體氣正調和不飢仍不渴間將酒

壺出醉向人家歇野食或烹鮮寓眠多擁褐抱琴滌啓
樂荷鋤劉伶達放眼看青山任頭生白髮不知天地內
更得幾年活從此到終身盡為閒日月

飽食閒坐

紅粒陸渾稻白鱗伊水魴庖童呼我食飯熟魚鮮香箸
箸適我口匙匙充我腸八珍與五鼎無復心思量捫腹
起盥漱下階振衣裳繞庭行數匝却上檐下牀箕踞擁
裘坐半身向日暘可憐飽暖味誰肯來同嘗是歲太和

八兵銷時漸康朝廷重經術草澤搜賢良堯舜求理切
夔龍啓沃忙懷才抱智者無不走遑遑惟此不才叟頑
慵戀洛陽飽食不出門閒坐不下堂子弟多寂寞僮僕
少精光衣食雖充給神意不揚揚為爾謀則短為吾謀
甚長

立名按周益公必大云居易以長慶二年過漢江詩
云秋水浙紅穠朝煙烹白鱗今復云紅粒陸渾穠白
鱗伊水魴蓋於一飲食間點寓忠愛不忘君之意所
謂造次必於是者時文宗雖恭儉儒雅而中人之禍
已萌其云朝廷重經術草澤搜賢良蓋謂不能用劉
蕡也又云堯舜求理切夔龍啓沃忙言上雖銳意於

治而王涯等為相非徒無益也又云懷才抱智者無不走遑遑指李訓鄭注等也明年而甘露之亂果作
居易其
知幾乎

閒居自題

門前有流水牆上多高樹竹徑繞荷池縈迴百餘步
波間戲魚鼈風靜下鷗鷺寂無城市喧渺有江湖趣
吾廬在其上偃卧朝復暮洛下安一居山中亦慵去
時逢過客愛問是誰家住此是白家翁閉門終老處

覽鏡喜老

今朝覽明鏡鬚鬢盡成絲行年六十四安得不衰羸親
屬惜我老相顧興歎咨而我獨微笑此意何人知笑罷
仍命酒掩鏡捋白髭爾輩且安坐從容聽我詞生若不
足戀老亦何足悲生若苟可戀老即生多時不老即須
夭不夭即須衰晚衰勝早夭此理決不疑古人亦有言
浮生七十稀我今欠六歲多幸或庶幾儻得及此限何
羨榮啓期當喜不當歎更傾酒一卮

風雪中作

歲暮風動地夜寒雪連天老夫何處宿煖帳溫爐前兩
重褐綺衾一領花茸糲粥熟呼不起日高安穩眠是時
心與身了無間事牽以此度風雪間居來六年忽思遠
遊客復想早朝士蹋凍侵夜行凌寒未明起心為身君
父身為心臣子不得身自由皆為心所使我心既知足
我身自安止方寸語形骸我應不負爾

對琴酒

西窻明且暖晚坐卷書帷琴匣拂開後酒鉶添滿時角

尊白螺琰玉軫黃金徽未及彈與酌相對已依依泠泠
秋泉韻貯在龍鳳池油油春雲心一杯可致之自古有
琴酒得此味者稀祇應康與籍及我三心知

雪中晏起偶詠所懷兼呈張常侍韋庶子皇甫

郎中

雜言

窮陰蒼蒼雪雰雰雪深沒脛泥埋輪東家典錢歸礙夜
南家貰米出凌晨我獨何者無此弊複帳重衾暖若春
怕寒放嬾不肯動日高睡足方頻伸餅中有酒爐有炭

甕中有飯庖有薪奴溫婢飽身晏起致茲快活良有因
上無臯陶伯益廊廟才的不能匡君輔國活生民下無
巢父許由箕穎操又不能食薇飲水自苦辛君不見南
山悠悠多白雲又不見西京浩浩惟紅塵紅塵鬧熱白
雲冷好於冷熱中間安置身三年徽倖忝洛尹兩任優
穩為商賓非賢非愚非智慧不富不貴不賤貧冉冉老
去過六十騰騰間來經七春不知張韋與皇甫私喚我
作何如人

和裴侍中南園靜興見示

池館清且幽高懷亦如此
有時簾動風盡日橋照水靜
將鶴為伴間與雲相似何必學
留侯崎嶇覓松子

春寒

今朝春氣寒自問何所欲
酥煖薤白酒乳和地黃粥豈
惟厭饞口亦可調病腹
助酌有枯魚佐餐兼旨蓄
省躬念前哲醉飽多慙
怛君不聞靖節先生尊
長空廣文先生飯不足

菩提寺上方晚望香山寺寄舒員外

晚登西寶刹晴望東精舍
反照轉樓臺輝輝似圖畫
冰浮水明滅雪壓松偃亞
石閣僧上來寒汀雁飛下
西京闌於市東洛間如社
曾憶舊遊無香山明月夜

二月一日作贈韋七庶子

園杏紅萼坼庭蘭紫芽出不覺春已深
今朝二月一去冬病瘡痂將養遵醫術
今春入道場清淨依僧律嘗聞聖賢語
所慎齋與疾遂使愛酒人停杯一百日
明朝二

月二疾平齋復畢應須挈一壺尋花覓韋七

犬鷲

晚來天氣好散步中門前門前何所有偶覩犬與鷲鷲
飽凌風飛犬暖向日眠腹舒穩貼地翅凝去聲高摩天上

無羅弋憂下無羈鎖牽見彼物遂性我亦心適然心適
復何為一詠逍遙篇此仍著於適適疑作迹尚未能忘言

夢劉二十八因詩問之

昨夜夢夢得初覺思踟躕忽忘來汝郡猶疑在吳都吳

都三千里汝郡二百餘非夢亦不見近與遠何殊尚能
齊近遠焉用論榮枯但問寢與食近日兩何如病後能
吟否春來曾醉無樓臺與風景汝又何如蘇相思一相
報勿復慵為書

閒吟

貧窮汲汲求衣食富貴營營役心力人生不富即貧窮
光陰易過閒難得我今幸在窮富間雖在朝廷不入山
看雪尋花翫風月洛陽城裏七年間

西行

衣裘不單薄，車馬不羸弱。
藹藹三月天，間行亦不惡。
壽安流水館，硤石青山郭。
官道柳陰陰，行宮花漠漠。
常聞俗間語，有錢在處樂。
我雖非富人，亦不苦寂寞。
家僮解絃管，騎從攜杯杓。
時向春風前，歇鞍開一酌。

東歸

翩翩平肩舁，中有醉老夫。
膝上展詩卷，竿頭懸酒壺。
食宿無定程，僕馬多緩驅。
臨水歇半日，望山傾一盃。
藉草

坐鬼我

並上聲

攀花行踟躕風將景共暖體與心同舒始

悟有營者居家如在途方知無繫者在道如安居前夕

宿三堂

三堂在號

今日遊申湖

申湖在陝

殘春三百里送我歸東

都

途中作

早上肩舁一杯平旦醉晚憩下肩舁一覺殘春睡身
不經營物心不思量事但恐綺與里只如吾氣味

小臺

新樹低如帳小臺平似掌六尺白藤牀一莖青竹杖風
飄竹皮落苔印鶴迹上幽境與誰同閒人自來往

睡後茶興憶楊同州

昨晚飲太過嵬峩

並上聲

連宵醉今朝餐又飽爛熯移時

睡睡足摩挲眼眼前無一事信脚繞池行偶然得幽致
婆娑綠陰樹斑駁青苔地此處置繩牀傍邊洗茶器白
瓷甌甚潔紅爐炭方熾沫下麴塵香花浮魚眼沸盛來
有佳色咽罷餘芳氣不見楊慕巢誰人知此味

題文集櫃

破柏作書櫃櫃牢柏復堅收貯誰家集題云白樂天我
生業文字自幼及老年前後七十卷小大三千篇誠知
終散失未忍遽棄捐自開自鑰閉置在書帷前身是鄧
伯道世無王仲宣只應分付女留與外孫傳

早熱二首

彤雲散不雨赫日吁可畏端坐猶揮汗出門豈容易忽
思公府內青衫折腰吏復想驛路中紅塵走馬使征夫

更辛苦逐客彌顛顛日入尚趨程宵分不遑寐安知北
窻叟偃卧風颯至簟拂碧龍鱗扇搖白鶴翅豈惟身所
得兼示心無事誰言苦熱天元有清涼地

勃勃旱塵氣炎炎赤日光飛禽颭將墜行人渴欲狂壯
者不耐飢飢火燒其腸肥者不禁熱喘息汗如漿此時
方自悟老瘦亦何妨肉輕足健逸髮少頭清涼薄食不
飢渴端居省衣裳數匙梁飯冷一領綃衫香持此聊過
日焉知畏景長

偶作二首

戰馬春放歸農牛冬歇息何獨徇名人終身役心力來
者殊未已去者不知還我今悟已晚六十方退閒猶勝
不悟者老死紅塵間

名無高與卑未得多健美事無小與大已得多厭賤如
此常自苦反此或自安此理知甚易此道行甚難勿信
人虛語君當事上者

池上作

西溪南潭皆
池中勝處也

西溪風生竹森森南潭萍開水沈沈
叢翠萬竿湘岸色空碧一泊松江心
浦派縈迴誤遠近橋島向背迷登臨
澄瀾方丈若萬頃倒影咫尺如千尋
泛然獨遊邈然坐坐念行心思古今
菟裘不聞有泉沼西河亦恐無雲林
豈如白翁退老地樹高竹密池塘深
華亭雙鶴白矯矯太湖四石青岑岑
眼前盡日更無客膝上此時惟有琴
洛陽冠蓋自相索誰肯來此同抽簪

何處堪避暑

何處堪避暑林間背日樓何處好追涼池上隨風舟日
高飢始食食竟飽還遊遊罷睡一覺覺來茶一甌眼明
見青山耳醒聞碧流脫鞵間濯足解巾快搔頭如此來
幾時已經六七秋從心至百骸無一不自由拙退是其
分榮耀非所求雖被世間笑終無身外憂此語君莫怪
靜思吾亦愁如何三伏月楊尹謫虔州

詔下

昨日詔下去罪人今日詔下得賢臣進退者誰非我事

世間寵辱常紛紛我心與世兩相忘時事雖聞如不聞
但喜今年飽飯喫洛陽禾稼如秋雲更傾一尊歌一曲
不獨忘世兼忘身

七月一日作

七月一日天秋生履道里間居見清景高興從此始林
間暑雨歇池上涼風起橋竹碧鮮鮮岸莎青靡靡蒼然
古磐石清淺平流水何言中門前便是深山裏雙僮侍
坐卧一杖扶行止飢聞麻粥香渴覺雲湯美

胡麻粥
雲母湯

生所好物今日多在此此外更何思市朝心已矣

開襟

開襟何處好竹下池邊地餘熱體猶煩早涼風有味黃
菱槐蘂結紅破蓮房墜無柰每年秋先來入哀思

自賓客遷太子少傅分司

頭上漸無髮耳間新有毫形容逐日老官秩隨年高優
饒又加俸間穩仍分曹飲食免藜藿居處非蓬蒿何言
家尚貧銀榼提綠醪勿謂身未貴金章照紫袍誠合知

止足豈宜更貪饕默然心自問於國有何勞

自在

杲杲冬日光明暖真可愛移榻向陽坐擁裘仍解帶小
奴槌我足小婢搔我背自問我為誰胡然獨安泰安泰
良有以與君論梗概心了事未了飢寒迫於外事了心
未了念慮煎於內我今實多幸事與心和會內外及中
間了然無一礙所以日陽中向君言自在

詠史

九年十一月作○按太和
九年甘露之變事載年譜

秦磨利刀斬李斯齊燒沸鼎烹鄢其可憐黃綺入商洛
間卧白雲歌紫芝彼為菹醢几上盡此作鸞皇天外飛
去者逍遙來者死乃知禍福非天為

因夢有悟

交友淪歿盡悠悠勞夢思平生所厚者昨夜夢見之夢
中幾許事枕上無多時款曲數杯酒從容一局碁

碁酒皆夢

中所見事

初見韋尚書

弘景

金紫何輝輝中遇李侍郎

建

笑言

甚怡怡終為崔常侍

亮

意色苦依依一夕三改變夢心

不驚疑此事人盡怪此理誰得知我粗知此理聞於竺
乾師識行妄分別智隱迷是非若轉識為智菩提其庶
幾

春遊

上馬臨出門出門復逡巡回頭問妻子應怪春遊頻誠
知春遊頻其柰老大身朱顏去復去白髮新更新請君
屈十指為我數交親大限年百歲幾人及七旬我今六
十五走若下坡輪假使得七十祇有五度春逢春不遊

樂但恐是癡人

題天竺南院贈閒元旻清上人

雜芳澗草合繁綠巖樹新山深景候晚四月有餘春竹
寺過微雨石徑無纖塵白衣一居士方袍四道人地是
佛國土人非俗交親城中山下別相送亦殷勤

哭師臯

南康丹旆引魂迴洛陽籃輦送葬來北邙原邊草樹

一作

村畔月苦煙愁夜過半妻孥兄弟號一聲十二人腸一

時斷往者何人送者誰樂天哭別師臯時平生分義向
人盡今日哀冤惟我知我知何益徒垂淚籃輿迴竿馬
迴轡何日重聞埽市歌誰家收得琵琶妓師臯醉後善
歌埽市詞又
有小妓工琵琶不
知今落在何處蕭蕭風樹白楊花蒼蒼露草青蒿氣
更就墳邊哭一聲與君此別終天地

隱几贈客

宦情本澹薄年貌又老醜紫綬與金章於予亦何有有
時獨隱几音然無所偶卧枕一卷書起嘗一杯酒書

將引昏睡酒用扶衰朽客到忽已酣脫巾坐搔首踈頑
倚老病容恕慙交友忽思莊生言亦擬鞭其後

夏日作

葛衣疎且單紗帽輕復寬一衣與一帽可以過炎天止
於便吾體何必被羅紈宿雨林筍嫩晨露園葵鮮烹葵
炮嫩筍可以備朝餐止於適吾口何必飲腥羶飯訖盥
漱已捫腹方果然婆娑庭前步安穩窻下眠外養物不
費內歸心不煩不費用難盡不煩神易安庶幾無天闕

得以終天年

晚涼偶詠

日下西牆西風來北窻北中有逐涼人單牀獨棲息飄
蕭過雲雨搖曳歸飛翼新葉多好陰初筠有佳色幽深
小池館優穩閒官職不愛勿復論愛亦不易得

酬牛相公宮城早秋寓言見示兼呈夢得

時夢得有疾

七月中氣後金與火交爭一聞白雪唱暑退清風生碧
樹未搖落寒蟬始悲鳴夜涼枕簟滑秋燥衣巾輕疏受

老慵出劉楨疾未平何人伴公醉新月上宮城

小臺晚坐憶夢得

汲泉灑小臺臺上無纖埃解帶面西坐輕襟隨風開晚涼間興動憶同傾一杯月明候柴戶藜杖何時來

種桃歌

食桃種其核一年核生芽二年長枝葉三年桃有花憶昨五六歲灼灼盛芬華迨茲八九載有減而無加去春已稀少今春漸無多明年後年後芳意當如何命酒樹

下飲停杯拾餘葩因桃忽自感悲吒成狂歌

狂言示諸姪

世欺不識字我忝攻文筆世欺不得官我忝居班秩人
老多病苦我今幸無疾人老多憂累我今婚嫁畢心安
不移轉身泰無牽率所以十年來形神間且逸况當垂
老歲所要無多物一裘煖過冬一飯飽終日勿言舍宅
小不過寢一室何用鞍馬多不能騎兩匹如我優幸身
人中十有七如我知足心中百無一傍觀愚亦見當

已賢多失不敢論他人狂言示諸姪

偶以拙詩數首寄呈裴少尹侍郎蒙以盛製四
篇一時酬和重投長句美而謝之

投君之文甚荒蕪數篇價直一束芻報我之章何璀璨
纍纍四貫驪龍珠毛詩三百篇後得文選六十卷中無
一靡麗龜絕報賽五鹿連柱難支梧高興獨因秋日盡
清吟多與好風俱銀鈎金錯兩殊重宜上屏風張座隅
立秋夕涼風忽至炎暑稍消即事詠懷寄汴州

節度使李二十尚書

嫋嫋檐樹動好風西南來紅釭霏微滅碧幌飄飄開披
襟有餘涼拂簟無纖埃但喜煩暑退不惜光陰催河秋
稍清淺月午方徘徊或行或坐卧體適心悠哉美人在
浚都旌旗繞樓臺雖非滄溟阻難見如蓬萊蟬吟節又
換鴈送書未迴君位日寵重我年日摧頽無因風月下

一舉平生杯

英華作一
與共持杯

開成二年夏聞新蟬贈夢得

十年來常與夢得
索居同在洛下每

聞蟬多有寄答今
喜以此篇唱之

十載與君別常感新蟬鳴今年共君聽同在洛陽城噪
處知林靜聞時覺景清涼風忽嫋嫋秋思先秋生殘槿
花邊立老槐陰下行雖無索居恨還動長年情且喜未
聾耳年年聞此聲

題牛相公歸仁里宅新成小灘

平生見流水見此轉留連況此朱門內君家新引泉伊
流決一帶洛石砌千拳與君三伏月滿耳作潺湲深處

碧粼粼淺處清濺濺
碕岸東鳴咽沙汀散
淪漣翻浪雪不盡
澄波空共鮮兩崖
灑瀕口一泊瀟湘
天曾作天南客
漂流六七年何山
不倚杖何水不停
船巴峽聲心裏
松江色眼前今朝
小灘上能不思悠
然

春日閒居三首

陶云愛吾廬吾亦愛吾屋
屋中有琴書聊以慰幽獨
是時三月半花落庭蕪綠
舍上晨鳩鳴窻間春睡足
睡足起閑坐景晏方
櫛沐今日非十齋
庖童饋魚肉飢來恣

餐歎冷熱隨所欲飽竟快搔爬筋骸無檢束豈徒暢肢體兼欲遺耳目便可傲松喬何假杯中渌

廣池春水平羣魚恣游泳新林綠陰成衆鳥欣相鳴

韻叶

時我亦蕭灑適無累與病魚鳥人則殊同歸於遂性緬思山梁雉時哉感孔聖聖人不得所慨然歎時命我今對鱗羽取樂成謠詠得所仍得時吾生一何幸

勞者不覺歌歌其勞苦事逸者不覺歌歌其逸樂意問我逸如何閒居多興味問我樂如何閒官少憂累又問

俸厚薄百千隨月至又問年幾何七十行欠二所得皆
過望省躬良可媿馬閒無羈絆鶴老有祿位設自為化
工優饒只如是安得不歌詠默默受天賜

小閣閒坐

閣前竹蕭蕭閣下水潺潺拂簾卷簾坐清風生其間靜
聞新蟬鳴遠見飛鳥還但有巾掛壁而無客叩關二疏
返故里四老歸舊山吾亦適所願求閑而得閑

遊平泉宴浥澗宿香山石樓贈座客

逸少集蘭亭季倫宴金谷金谷太繁華蘭亭闕絲竹何
如今日會浥澗平泉曲杯酒與管絃貧中隨分足紫鮮
林筍嫩紅潤園桃熟采摘助盤筵芳滋盈口腹閒吟暮
雲碧醉藉春草綠舞妙艷流風歌清叩寒玉古詩惜晝
短勸我令秉燭是夜勿言歸相攜石樓宿

池上幽境

裊裊過水橋微微入林路幽境深誰知老身閒獨步行
行何所愛遇物自成趣平滑青盤石低密綠陰樹石上

一素琴樹下雙草屨此是滎先生坐禪三樂處

夏日閒放

時暑不出門亦無賓客至靜室深下簾小庭新埽地褰
裳復岸幘閒傲得自恣朝景枕簟清乘涼一覺睡午餐
何所有魚肉一兩味夏服亦無多蕉紗三五事資身既
給足長去聲物徒煩費若比簞瓢人吾今太富貴

和思黯居守獨飲偶醉見示六韻時夢得和篇

先成頗為麗絕因添兩韻繼而美之

宮漏滴漸闌城烏啼復歇此時若不醉爭柰千門月
人中夜起妓燭前羅列歌袂默收聲舞鬟低赴節絃吟
玉柱品酒透金杯熱朱顏忽已酩清奏猶未闋妍詞黯
先唱逸韻劉繼發鏗然雙雅音金石相磨戛

和夢得洛中早春見贈七韻

衆皆賞春色君獨憐春意春意竟如何老夫知此味燭
餘減夜漏衾暖添朝睡恬和臺上風虛潤池邊地開遲
花養豔語嬾鶯含思似訝隔年齋如勸迎春醉何日同

宴遊心期二月二

此日出
齋故云

櫻桃花下有感而作

開成三年春季美
周賓客南池者

藹藹美周宅櫻繁春日斜一為洛下客十見池上花爛

熳豈無意為君占年華風光饒此樹歌舞勝諸家失盡

白頭伴長成紅粉娃停杯兩相顧堪喜亦堪嗟

白頭伴
紅粉娃

皆有
所屬

洗竹

布裘寒擁頸羶履溫承足獨立冰池前久看洗霜竹先

除老且病次去纖而曲翦棄猶可憐琅玕十餘束青青
復籜籜頗異凡草木依然若有情迴顧語僮僕小者截
魚竿大者編茅屋勿作琴與其而今糞土辱

新沐浴

形適外無恙心恬內無憂夜來新沐浴肌髮舒且柔寬
裁夾烏帽厚絮長白裘裘溫裹我足帽暖覆我頭先進
酒一杯次舉粥一甌半酣半飽時四體春悠悠是月歲
陰暮慘冽天地愁白日冷無光黃河凍不流何處征戍

行何人羈旅遊窮途絕糧客寒獄無燈囚勞生彼何苦
遂性我何優撫心但自媿孰知其所由

三年除夜

晰晰燎火光氤氳臘酒香嗤嗤童穉戲迢迢歲夜長堂
上書帳前長幼合成行以我年最長次第來稱觴七十
期漸近萬緣心已忘不惟少歡樂兼亦無悲傷素屏應
居士青衣侍孟光夫妻老相對各坐一繩牀

顧虎頭畫
維摩居士

圖白衣
素屏也

自題小園

不關門館華不關林園大但關為主人一坐十餘載迴
看甲乙第列在都城內素垣夾朱門藹藹遙相對主人
安在哉富貴去不迴池乃為魚鑿林乃為禽栽何如小
園主拄杖閒即來親賓有時會琴酒連夜開以此聊自
足不羨大池臺

病中晏坐

有酒病不飲有詩慵不吟頭眩平罷垂釣手痺休援琴

竟日悄無事所居間且深外安支離體中養希夷心窻
戶納秋景竹木澄夕陰宴坐小池畔清風時動襟

戒藥

促促急景中蠢蠢微塵裏生涯有分限愛戀無終已早
天羨中年中年羨暮齒暮齒又貪生服食求不死朝吞太
陽精夕吸秋石髓徼福反成災藥誤者多矣以之資嗜
慾又望延甲子天人陰隲間亦恐無此理域中有真道
所說不如此後身始身存吾聞諸老氏

贈夢得

前日君家飲昨日王家宴今日過我廬三日三會面當
歌聊自放對酒交相勸為我盡一杯與君發三願一願
世清平二願身強健三願臨老頭數與君相見

逸老

莊子云勞我以生逸我以老息我以死也

白日下駸駸青天高浩浩人生在其中適時即為好勞
我以少壯息我以衰老順之多吉壽違之或凶夭我初
五十八息老雖非早一閑十三年所得亦不少况加祿

仕後衣食常溫飽又從風疾來女嫁男婚了胃中一無
事浩氣凝襟抱飄若雲信風樂於魚在藻桑榆坐已暮
鐘漏行將曉皤然七十翁亦足稱壽考筋骸本非實一
束芭蕉草卷屬偶相依一夕同棲鳥去何有顧戀住亦
無憂惱生死尚復然其餘安足道是故臨老心冥然合

玄造

立名按倪思云樂天平生詩文既高立朝忠直而有
用為郡守多遺愛處謫地不少挫屈於牛李與之遊
不為所污亦不致賈禍晚年優游分
司有林泉聲伎之奉是真可慕羨也

遇物感興因示子弟

聖擇狂夫言俗信老人語我有老狂詞聽之吾語汝吾
觀器用中劍銳鋒多傷吾觀形骸內骨勁齒先亡寄言
處世者不可苦剛強龜性愚且善鳩心鈍無惡人賤拾
支牀鶻欺擣煖脚寄言立身者不得全柔弱彼固罹禍
難此未免憂患平于何保終吉強弱剛柔間上遵周孔
訓旁鑒老莊言不惟鞭其後亦要輒其先

首夏南池獨酌

春盡雜英歇夏初芳草深薰風自南至吹我池上林綠
蘋散還合蘋鯉跳復沈新葉有佳色殘鶯猶好音依然
謝家物池酌對風琴慙無康樂作秉筆思沈吟境勝才
思劣詩成不稱心

官俸初罷親故見憂以詩諭之

七年為少傅品高俸不薄乘軒已多慙况是一病鶴又
及懸車歲筋力轉衰弱豈以貧是憂尚為名所縛今春
始病免纓組初擺落蜩甲有何知雲心無所著囿中殘

舊穀可備歲飢惡園中多新蔬未至食藜藿不求安師
卜不問陳生藥但對丘中琴時開池上酌信風舟不繫
掉尾魚方樂親友不我知而憂我寂寞

安與陳皆洛
下藝術精者

閒居偶吟招鄭庶子皇甫郎中

自哂此迂叟少迂老更迂家計不一問園林聊自娛竹
間琴一張池上酒一壺更無俗物到但與秋光俱古石
蒼錯落新泉碧縈紆馬用車馬客即此是吾徒猶有所
思人各在城一隅杳然愛不見搔首方踟躕玄晏風韻

遠子真雲貌孤誠知厭朝市何必憶江湖能來小澗上
一聽潺湲無

亭西牆下伊渠水中置石激流潺湲成韻頗有

幽趣以詩記之

嵌巉嵩石峭皎潔伊流清立為遠峯勢激作寒玉聲夾
岸羅密樹面灘開小亭忽疑巖子瀨流入洛陽城是時
羣動息風靜微月明高枕夜悄悄滿耳秋泠泠終日臨
大道何人知此情此情苟自愜亦不要人聽

閒題家池寄王屋張道士

有石白磷磷有水清潺潺有叟頭似雪婆娑乎其間進
不趨要路退不入深山深山太濶落要路多險艱不如
家池上樂逸無憂患有食適吾口有酒醅吾顏恍惚遊
醉鄉希夷造玄關五千言下悟十二年來閑富者我不
顧貴者我不攀惟有天壇子時來一往還

李盧二中丞各創山居俱誇勝絕然去城稍遠
來往頗勞敝居新泉實在宇下偶題十五韻

聊戲二君

龍門蒼石壁

李所有也

浥澗碧潭水

盧所有也

各在一山隅迢迢

幾十里清鏡碧屏風惜哉信為美愛而不得見亦與無

相似聞君每來去矻矻事行李脂轄復裹糧心力頗勞

止未如吾舍下石與泉甚邇鑿鑿復濺濺晝夜流不已

洛石千萬拳襯波鋪錦綺海珉一兩片激瀨含宮徵綠

宜春濯足淨可朝漱齒繞砌紫鱗游拂簾白鳥起何言

履道叟便是滄浪子君若趁歸程請君先到此願以潺

爰聲洗君塵土耳

北窻竹石

一片瑟瑟石數竿青青竹向我如有情依然看不足况
臨北窻下復近西塘曲筠風散餘清苔雨含微綠有妻
亦衰老無子方煢獨莫掩夜窻扉共渠相伴宿

飲後戲示弟子

吾為爾先生爾為吾弟子孔門有遺訓復坐吾告爾先
生饌酒食弟子服勞止孝敬不在他在茲而已矣欲我

少憂愁欲我多歡喜無如醞好酒酒須多且旨旨即賓
可留多即蠱不恥吾更有一言爾宜聽入耳人老多憂
貧人病多憂死我今雖老病所憂不在此憂在半酣時
尊空座客起

閑坐看書貽諸少年

雨砌長寒蕪風庭落秋果窻間有閒叟盡日看書坐書
中見往事歷歷知福禍多取終厚亡疾驅必先隨勸君
少干名名為錮身鏢勸君少求利利是焚身火我心知

已久吾道無不可所以雀羅門不能寂寞我

夢上山

時足疾
未平

夜夢上嵩山獨攜藜杖出千巖與萬壑遊覽皆周畢夢
中足不病健似少年日既悟神返初依然舊形質始知
形神內形病神無疾形神兩是幻夢悟俱非實畫行雖
蹇澀夜步頗安逸晝夜既平分其間何得失

對酒閑吟贈同老者

人生七十稀我年幸過之遠行將盡路春夢欲覺時家

事口不問世名心不思老既不足歎病亦不能治扶持
仰婢僕將養信妻兒飢飽進退食寒暄加減衣聲妓放
鄭衛裘馬脫輕肥百事盡除去尚餘酒與詩興來吟一
篇吟罷酒一卮不獨適情性兼用扶衰羸雲液灑六腑
陽和生四肢於中我自樂此外吾不知寄問同老者舍
此將安歸莫學蓬心叟冑中殘是非

晚起間行

幡然一老子擁裘仍隱几坐穩夜忘眠卧安朝不起起

來無可作閉目時叩齒靜對銅爐香暖漱銀餅水午齋
何儉潔餅與蔬而已西寺講楞伽間行一隨喜

香山居士寫真詩

并序

元和五年予為左拾遺翰林學士奉詔寫真於集賢
殿御書院時年三十七會昌二年罷太子少傅為白
衣居士又寫真於香山寺藏經堂時年七十一前後
相望殆將三紀觀今照昔慨然自歎者久之形容非
一世事幾變因題六十字以寫所懷

立名按公生於壬子三十七歲為元和三年丁亥若
五年庚寅則年三十九矣此五年當誤况序中云前
後相望殆將三紀時年七十一為會昌二年壬戌自
丁亥至壬戌計三十五年與將三紀之語正合三五
字形易誤其為傳
寫之誤無疑也

昔作少學士圖形入集賢今為老居士寫貌寄香山鶴
毳變玄髮雞膚換朱顏前形與後貌相去三十年勿歎
韶華子俄成皤叟仙請看東海水亦變作桑田

二年三月五日齋畢開素當食偶吟贈妻弘農

郡君

睡足肢體暢晨起開中堂初旭泛簾幕微風拂衣裳二
婢扶盥櫛雙童舁簟牀庭東有茂樹其下多陰涼前月
事齋戒昨日散道場以我久蔬素加籩仍異糧魴鱗白
如雪蒸炙加桂薑稻飯紅似花調沃新酪漿佐以脯醢
味間之椒薤芳老憐口尚美病喜鼻聞香嬌駮三四孫
索哺繞我傍山妻未舉案饒叟已先嘗憶同牢菴初家
貧共糟糠今食且如此何必烹豬羊况觀姻族間夫妻
半存亡偕老不易得白頭何足傷食罷酒一杯醉飽吟

又狂緬想梁高士樂道喜文章徒誇五噫作不解贈孟
光

不出門

彌月不出門永日無來賓食飽更拂牀睡覺一頓伸輕
簾白鳥羽新篔青箭筠方寸方丈室空然兩無塵披衣
腰不帶散髮頭不巾袒跣北窻下葛天之遺民一日亦
自足况得以終身不知天壤内自我為何人

感舊 并序

故李侍郎杓直長慶元年春薨元相公微之太和六年秋薨崔侍郎晦叔太和七年夏薨劉尚書夢得會昌二年秋薨四君子予之執友也二十年間凋零共盡惟予衰病至今獨存因詠悲懷題為感舊

晦叔墳荒草已陳夢得墓溼土猶新微之捐館將一紀杓直歸丘二十春城中雖有故第宅庭蕪園廢生荆榛篋中亦有舊書札紙穿字蠹成灰塵平生定交取人窄屈指相知惟五人四人先去我在後一枝蒲柳衰殘身

豈無晚歲新相識
相識面親心不親
人生莫羨苦長命
命長感舊多悲辛

送毛仙翁

江州司馬時作○立名按此詩舊編後集當是從後追憶錄入者毛仙翁

能預決人休咎或晚年思其言有驗遂存此詩耳餘並附詳詩後

仙翁已得道
混迹尋巖泉
肌膚冰雪瑩
衣服雲霞鮮
紺髮絲並綴
韶容花共妍
方瞳點玄漆
高步凌非一作飛煙

幾見桑海變
莫知龜鶴年
所憩九清外
所遊五岳巔
軒吳舊為侶
松喬難比肩
嗟人世
人役役如狂顛
孰能

脫羈鞅盡遭名利牽貌隨歲律換神逐光陰遷惟余負
憂譴顛顛溢江壖良鬢忽霜白愁腸如火煎羈旅坐多
感徘徊私自憐睛眺五老峯玉洞多神仙何當憫湮厄
授道安虛辱我師惠然來論道窮重玄浩蕩八溟濶志
泰心超然形骸既無束得喪亦都捐豈識椿菌異那知
鵬鷄懸丹華既相付促景定當延玄功曷可報感極惟
勤拳霓旌不肯駐又歸武夷川語罷倏然別孤鶴升遙
天賦詩敘明德永續步虛篇

附紀事韓愈云仙翁姓毛氏名于姬與韓為
族愈末年為弟也相識於潮陽逆旅叙宗焉
察其言不山乎孔聖道不由乎老莊教而以
慧性知人爵祿厚薄壽命長短發言如騁駟
躡嚙持疑於脣吻間即信乎異人也若古之
許負輩不足言矣然兄言果有證愈自典表
州從袁州除國子祭酒後主兵部事續拜京
兆尹又改吏部郎中若如言即埽茅屋俟兄
一日歡笑亦不朽之名也酒酣留詞走筆而
成不能采其文章之要也時元和十四年已
亥四月十六日族弟門人韓愈序裴度云仙
翁齋神胎元抱和含真穆然道風煦然如春
追駐穉色將數百年光陰自駛寒暑不易鑪
鎚之問物無不化養之在我得之自然牛僧
孺云僧孺見仙翁兄深仰其為真人也又云
凡不離世間而出世間浩蕩乎嗜慾之境踈

躡乎人情之囿三事五侯躬擁琴于門獲禮
仙翁者為榮不獲禮為羞元稹云余廉問浙東
歲毛仙翁惠然來顧越之人士識之者咸相
與言曰仙翁嘗與葉法善吳筠遊於稽山迨
茲多歷年所而風貌愈少蓋神仙者流也余
因得執弟子之禮師其道焉語多不能盡載
時李翱 令狐楚 李程 李宗閔 崔郾
王起 李益 鄭澣 楊於陵 楊嗣復
劉禹錫 崔元畧 柳公綽 李紳
張仲方各有詩篇詠其神異

達哉樂天行

達哉達哉白樂天分司東都十三年七旬纔滿冠已掛
半祿未及車先懸或伴遊客春行樂或隨山僧夜坐禪

二年忘却問家事門庭多草廚少煙庖童朝告鹽米盡
侍婢暮訴衣裳穿妻孥不悅甥姪悶而我醉卧方陶然
起來與爾畫生計薄產處置有後先先賣南坊十畝園
次賣東郭五項田然後兼賣所居宅髣髴獲緡二三千
半與爾充衣食費半與吾供酒肉錢吾今已年七十一
眼昏鬚白頭風眩但恐此錢用不盡即先朝露歸夜泉
未歸且住亦不惡飢餐樂飲安穩眠死生無可無不可
達哉達哉白樂天

能無媿

十兩新綿褐披行暖似春一團香絮枕倚坐穩於人婢
僕遣他嘗藥酒兒孫與我拂衣巾迴省左右能無媿養
活枯殘廢退身

白香山詩集卷二十四